



Äntwert vum Minister fir Energie op d'parlamentaresch Fro n°6042 vum 7. Abrëll 2022 vum éierewäerten Deputéierte Fred Keup iwwert en Embargo vu russeschem Gas a Pétrol

1. Op wéi eng Impaktstudie huet den Här Minister sech bei der uewen zitierter Ausso beruff? A wéi engem Delai gedenkt den Här Minister der Chamber dës Etude ze iwwermëttelen?

D'Europäesch Kommissioun koordinéiert de sougenannte "Gas coordination group" dem seng Aufgab et ass tëscht den EU Memberstaten an zesumme mat der Kommissioun ënner anerem Theme betreffend d'Versuergungssécherheet ze diskutieren. An dem Kader héiert dee Grupp dann och oft d'Meenunge vu verschiddenen Acteuren aus der Gaswirtschaft. Dorënner ass och ENTSOG, also den europäesche Verband vun de Gastransportnetzbedreiwer. ENTSOG fäerdeg iwwert d'Joer ee sougenannte "Summer Outlook" an ee "Winter Outlook" un, an deenen et drëms geet fir d'europäesch Versuergungssécherheet am Gasberäich ze beschreiwen. Am Kader vu sengem Update zum leschte "Winter Outlook 21/22" an dem kierzlech publizéierte "Summer Outlook 2022" huet ENTSOG verschidden extrem Zenarien analyséiert fir festzestellen wéi eng Auswierkungen des dann op d'Versuergungssécherheet hätten.

2. Kann den Här Minister matdeelen, wéi eng konkret präislech Konsequenzen a potenziell Enkpäss sech aus engem Embargo vu russeschem Gas a Pétrol fir eis Stéit an eis Betriber, souwéi eis allgemeng Mobilitéit géifen erginn?

Et ass dervun auszugehen, dass Pétrols- a Gaspräisser op den internationale Bourssen, duerch déi aktuell ugespaante Situatioun, och déi nächst Méint op engem héijen Niveau wäerte bleiwen. Wat Versuergung, besonnesch vum Äerdgas ugeet, wäerten, Kenntnisstand haut, op mannst bis zum Hierscht keng Liwwerschwieregkeeten an Europa z'erwaarde sinn. Et ass awer de Moment nach schwéier anzeschätze wéi eng Länner an Europa vu méigleche Liwwerenkpäss ab Hierscht kënnen betraff ginn a wéi staark des Enkpäss kéinte sinn. Verschidde Länner an Osteuropa, awer och Däitschland an Éisträich, si méi vu russeschem Äerdgas ofhängeg wéi beispillsweis Lëtzebuerg respektiv Belsch, mat deene Lëtzebuerg eng gemeinsam Maartzon bilt. Fir eventuellen Enkpäss virzebeuge sinn EU Memberstaten awer am gaangen eng Rei Mesuren z'ergräifen. Dorënner fält zum Beispill och eng Obligatioun déi soll sécherstellen, dass déi ënnerierdesch Gasstocken an Europa virun de kale Méint gutt gefëllt sinn. Doriwwer eraus sinn d'Länner am gaange fir alternativ Source vun Äerdgas ze sichen an do gëtt virun allem op flëssegem Äerdgas (LNG) gesat, dee mat Schëffer op LNG-Terminalen, wéi zum Beispill zu Zeebrugge an der Belsch, geliwwert ginn a vun do aus an dat europäescht Gasnetz aspeisen.

Bei Pétrolsproduite gëllt Änlech. Och hei ginn et EU Memberstaten déi am Moment méi oder manner vun Importer aus Russland ofhängeg sinn. Well de Pétrolsmarché ee Weltmarché ass, gëtt sech erwaart, dass déi russesch Produiten à terme duerch Produiten anerer Hierkonft kënnen ersat ginn. D'Ëmsetzung an de Memberstate vun der Direktive 2009/119/CE vum 14. September 2009 iwwert d'Obligatioun fir d'Memberstaate fir ee minimalen Niveau vu Stockage vu Réiueleg oder Pétrolsproduiten ze hale mécht, dass an der EU strategesch Reserve vun op mannst 90 Deeg virgehale ginn.

Falls et an Europa den nächste Wanter dann awer zu Liwwerschwieregkeeten am Gas sollt kommen, da mussen effektiv gegebenenfalls déi grouss Betriber als éischt ofgeschalt ginn, fir dass Haushaltsclienten, déi als geschützt gëllen, weider kënnen beliwwert ginn. Hei gëtt et genee Pläng déi vun den Netzbedreiwer ausgefouert ginn a wou, ofhängeg vun de Volummen déi feelen, festgeluecht ass wéi eng Kategorie vu Betriber ofgeschalt musse ginn. Och hei wäerten déi Länner, déi méi staark vu russeschem Gas ofhängeg sinn, méi staark betraff si wéi déi aner Länner. Et ass awer och esou, dass den Energieministère eng Sensibiliséierungscampagne wäert zesumme mat aneren Acteuren dëst Joer lancéiere fir privat Persounen, Staat, Gemengen an Entreprises ze sensibiliséieren an ze berode fir hire Verbrauch vu Gas a Mazout erofzesetzen, esou dass d'Noutwennegkeet fir d'obligatoresch Ofschalte méiglechst evitéiert gëtt.

3. An där zitierter Emissioun huet den Här Minister och ugekënnegt, den Hierscht wëllen eng grouss Campagne ze lancéieren, fir d'Leit zur Energiespuersamkeet unzehalen. Kann den Här Minister matdeelen, no wéi enge Modalitéiten dës Campagne soll organiséiert ginn a wéi eng konkret Ziler sollen erreecht ginn?

Lëtzebuerg huet sech an de leschte Wochen a Méint op europäeschem Niveau dofir agesat, dass mir am Hierscht eng koordinéiert Aspueercampagne an alle 27 Länner vun der EU organiséieren. D'EU-Kommissioun krut elo den Optrag vun de 27 Energieministere fir hefir e Virschlag ze maachen. D'Zil vun esou enger Campagne ass et geziilt souwuel Gas wéi och Ueleg anzespuere fir soumat en Impakt op de Marché kënnen ze hunn. Mir waarden elo ob de Virschlag vun der EU-Kommissioun a Lëtzebuerg wäert sech dann esou enger Campagne uschléissen.

D'Klima-Agence informéiert d'Bierger haut schonn op der Internetsäit www.energie-spueren.lu iwwert méiglech Moosname fir Energie anzespueren. Des Weideren informéieren och d'Energiefournisseuren am Kader vun hiren Energieaspuerobligatiounen iwwert méiglech Moosname fir den Energieverbrauch ze reduzéieren.

Lëtzebuerg, de 6. Mee 2022

(s.) Claude Turmes
Minister fir Energie